

Moción conxunta de condena ao ataque á exposición na Alameda sobre as mortes de persoas refuxiadas e migrantes, e en defensa deses mesmos colectivos.

O día 20 de xuño celébrase o Día Mundial das Persoas Refuxiadas. No marco dos actos conmemorativos da efeméride, a Unidade de Atención ás Migracións do Concello de Santiago de Compostela, en colaboración coa Rede Galega de Apoio ás Persoas Refuxiadas, organizou a exposición consistente nas listaxes das 40.555 mortes documentadas de persoas refuxiadas e migrantes, que foi situada na Alameda.

O día 19 de xuño dita exposición foi atacada ata ser totalmente esnaquizada. Este ataque prodúcese claramente de forma dolosa co obxectivo de intimidar, ameazar, sinalar e degradar ás persoas que inmigran ou solicitan asilo, e impedir que se execute na cidade un acto de recoñecemento ao sufrimento e padecemento que implica de por si o feito de migrar e buscar refuxio noutro país.

A única resposta admisible das institucións democráticas dun Estado de dereito, é intensificar a defensa dos Dereitos Humanos nas situación de vulnerabilidade e precariedade que se producen no marco das migracións cara a Europa, e dar todo o soporte e apoio posible para salvagardar a vida, a integridade e o benestar das persoas que migran cara a Europa, apoio que debe reflectirse de forma material, mais tamén moral e política.

Na última década Europa vive unha preocupante intensificación dos discursos reaccionarios, xenófobos e racistas dirixidos contra a poboación emigrante ou estranxeira. Este discurso toma distintas formas e se canaliza a través de distintos movementos de ultradereita nos países europeos, sobre todo a raíz da onda de refuxiados producida polos conflitos resultantes da Primavera Árabe, que levaron millón de refuxiados a cruzar o Exeo e o Mediterráneo na busca de refuxio e asilo dentro da Unión Europea.

A pesares de que España non foi unha das principais vías de entrada a Europa como resultado desa crise, nin tampouco un dos principais países de destino das ondas de refuxiados, iso non impediu que a ultradereita sinalase aos inmigrantes e especialmente a aqueles máis vulnerables, chamando á violencia e sinalando con diversas campañas de odio aos inmigrantes e

especialmente aos máis vulnerables, dirixindo incluso campañas de odio específicas contra os menores de idade. As campañas de odio acostuman a dirixirse a criminalizar aos colectivos de persoas estranxeiras e a xerar un sentimento de agravio contra elas, así como a deslexitimar a acción social de apoio ás persoas inmigrantes e o cumprimento dos seus dereitos sociais.

Estas accións pretenden crear un clima intimidatorio e teñen a capacidade de incentivar os ataques contra a poboación inmigrante, ao producir unha cobertura de lexitimación que da soporte ás agresións físicas, verbais e morais contra a poboación estranxeira residente en España. Así, as distintas accións promovidas polo partido político Vox teñen como resultado un aumento dos ataques xenófobos. Estes ataques poñen en perigo en primeiro lugar os dereitos das persoas inmigrantes, pero son tamén un ataque contra a seguridade e a cohesión do conxunto da sociedade e do Estado de Dereito. Estes aspectos foron destacados (*inter alia*) por Sebastian Rinken, investigador do Instituto de Estudos Sociais Avanzados do CSIC, que puxo de manifesto a ameaza que a ultradereita nacionalista supón para o conxunto da sociedade nun artigo titulado *El peligro de la xenofobia*, publicado no 2019 polo Comité Especializado en Inmigración do Consello de Seguridade Nacional do Goberno de España. O conxunto da publicación permite concluír que o auténtico perigo da inmigración non é esta mesma, senón a xenofobia e os movementos que promoven a exclusión social das persoas migrantes e con iso desfiguran o noso réxime de dereitos e liberdades e os fundamentos da nosa convivencia.

En consecuencia, o ataque que se ten producido contra a exposición situada na Alameda non debe ser tratado coma un incidente desafortunado, senón como un ataque grave contra a convivencia, polo seu carácter simbólico como agresión contra un colectivo vulnerable que é susceptible de lexitimar posturas xenófobas.

Nos peores momentos da incidencia migratoria na Unión Europea, moitos cidadáns amosaron o seu apoio e soporte aos refuxiados que chegaron a Europa, dende distintas posicións e sensibilidades políticas, pero unidos por un profundo sentimento de solidariedade e de convicción democrática na universalidade dos dereitos fundamentais e dos dereitos humanos.

Este soporte non se traduciu soamente en políticas a nivel europeo ou estatal, senón tamén nunha toma de postura tamén por parte de moitas administracións e autoridades públicas do ámbito local, que promoveron a integración, a inclusión e a atención á inmigración e aos refuxiados e loitaron contra a criminalización das persoas inmigrantes e refuxiadas nas súas cidades e vilas. Desgraciadamente, moitos deles tiveron que enfrontar o hostigamento e a hostilidade dos movementos de ultradereita que se dirixiron contra aqueles que decidiron poñerse do lado dos dereitos humanos. Un dos casos máis lamentables foi o de Walter Lübcke,

político alemán da CDU e presidente do Distrito de Kassel, que foi asasinado dun disparo o 2 de xuño de 2019 por un militante da ultradereita alemá a causa de ter manifestado o seu apoio ao acollemento das persoas refuxiadas en Alemaña.


A migración é un fenómeno consubstancial ao ser humano e o impacto que diversos eventos teñen sobre o desprazamento das persoas polos territorios; e se isto é certo universalmente, aínda o é máis para Galicia, cuxa historia está profundamente marcada pola emigración, ata o punto de que sería imposible entendela sen comprender os profundos efectos que esta tivo na sociedade galega.

Posto que o Pleno da Corporación xa se tivo pronunciado por unanimidade no seu apoio ás persoas refuxiadas no ano 2016, e considerando que non debe permanecer impasible ante un acto que pretende poñer en cuestión a convivencia, a cohesión e os dereitos das persoas migrantes e refuxiadas, e que persigue sinalalas, intimidalas e inxurias, propónse ao Pleno do Concello adoptar o seguinte acordo:

1.- O Concello de Santiago de Compostela reafírmase no apoio a tódalas persoas que migran ou se acollen ao dereito de asilo ou refuxio, e comprométese na defensa dos seus dereitos e da súa integridade moral.

2.- O Concello de Santiago de Compostela condena rotundamente o ataque contra a exposición promovida con ocasión do Día Mundial das Persoas Refuxiadas no Paseo dos Leóns do Parque da Alameda.

3.- A Corporación Municipal reafirma o seu compromiso de continuar a desenvolver políticas en prol do apoio e o soporte aos inmigrantes e refuxiados que residen en Santiago, e de promover a súa integración e benestar a través da Unidade de Atención ás Migracións e os demais servizos dos que dispón o Concello.



**CONCELLO DE
SANTIAGO**